

I nderuar Kryeministër Kurti

Të nderuar përfaqësues të institucioneve të Republikës së Kosovës, Minister Çeku dhe Ministre Bogujevci,

E nderuara akademike Anila Hoda dhe akademik Gëzim Hoxha, përfaqësues nga Akademia e Shkencave të Shqipërisë,

I nderuar Rektori i Universitetit të Prishtinës, prof.dr. Arben Hajrullahu

Të nderuar anëtarë të familjes Qosja,

Të nderuar akademikë, përfaqësues të botës shkencore e kulturore,

Të dashur qytetarë,

Në këtë mbledhje komemorative, me ndjenjë të thellë dhe përgjegjësi institucionale, qëndrojmë të bashkuar në dhimbje për të nderuar jetën, veprën dhe për t'i dhënë lamtumirën e fundit një prej figurave të rëndësishme të kulturës dhe mendimit shqiptar – akademik Rexhep Qosja.

Në këto çaste përkujtimi, në emër të Akademisë së Shkencave dhe të Arteve të Kosovës, ju ftoj që me një minutë heshtje të nderojmë jetën, veprën dhe personalitetin e tij.

*I përjetshëm qoftë kujtimi i akademik Rexhep Qosjes.*

*Lavdi jetës dhe veprës së tij.*

Akademik Qosja ishte më shumë se një shkrimtar; ai ishte një institucion në vetvete. Një zë i fuqishëm i arsyes kritike dhe një mbrojtës i palëkundur i së vërtetës.

Humbja e tij nuk është vetëm humbje e letërsisë dhe kulturës sonë. Ajo përbën një humbje të madhe kombëtare – një zbrazëti që prek ndërgjegjen intelektuale të të gjithë shqiptarëve, kudo që ndodhen.

Veprimtaria e tij shumëdimensionale – si studiues, shkrimtar, kritik letrar dhe mendimtar publik – përfaqëson arritje të rëndësishme të kulturës shqiptare bashkëkohore.

Ai ndërtoi një opus të gjerë dhe të qëndrueshëm, i cili jo vetëm pasuroi fondin tonë shkencor e letrar, por edhe kontribuoi në formësimin e vetëdijes sonë kombëtare në periudha vendimtare historike.

Trashëgimia që ai lë pas mbetet një udhërrëfyes i çmuar – një pasuri e mendimit, e krijimtarisë dhe e integritetit, që do të vazhdojë të frymëzojë brezat që vijnë.

Vepra e tij do të vazhdojë të jetojë si një referencë e rëndësishme e dijes dhe si një burim frymëzimi për studiuesit, krijuesit dhe të gjithë ata që besojnë në fuqinë e mendimit të lirë.

Akademik Qosja mishëroi në mënyrë të denjë figurën e intelektualit të angazhuar, të përkushtuar ndaj së vërtetës dhe të palëkundur në mbrojtjen e vlerave themelore të shoqërisë.

Ai mbeti gjithmonë konsekuent në mendimin e tij, duke dëshmuar integritet të lartë dhe guxim qytetar, edhe në rrethana kur fjala e lirë kërkonte sakrificë.

Institucionet dhe krijuesit letrarë e çmojnë lart kontributin e tij në zhvillimin e letërsisë dhe të mendimit kritik, si dhe rolin e tij në afirmimin e vlerave kulturore shqiptare në hapësirën kombëtare dhe ndërkombëtare.

Në këtë çast të rëndë, shpreh ngushëllimet më të thella dhe më të sinqerta për familjen Qosja, për kolegët dhe për gjithë komunitetin akademik e kulturor shqiptar.

Le të jetë ky përkujtim jo vetëm një akt nderimi, por edhe një ripërtëritje e përkushtimit tonë për vlerat që ai përfaqësoi.

*I përjetshëm qoftë kujtimi i akademik Rexhep Qosjes.*